

李少保詩集叙

歲在癸卯河決單父

天子憂之召今少保大司馬李公  
治水於豫兗徐揚且使近河節  
鉞諸臣咸稟而為政續命與焉  
中秋之夕公至于濟寧惠而思



我有詩人倡予和子之興為賦  
北海風流志憶也續始知公之  
長于詩其冬各以荒度至單父  
讌于琴臺邂逅相遇實適我願  
為獻玄珪入告之章公為之賦  
巨鰲奠四極其詩益工氣益壯

549291  
Hes, 38

明年夏公開泐告成又潛朱旺  
口續往視之公讌之河上為賦  
我，山上松凡四章詩有白水  
盟心鑒以晴昊語則周公所謂  
若游大川暨汝共濟者也續獻  
誅茅小詩一章其四詩者今猶



未和蓋人各有才公才大續非  
其偶也於是公乃盡出生平所  
為詩示續初為之諷嵩下嘆  
曰美哉翩翩乎白馬金羈河朔  
少年逸氣也秋興登嶽則懷古  
之思轉深矣為之諷南都嘆曰

美哉洋洋乎博而雅麗而奇殆  
與龍蟠虎踞之勢相頡頏也落  
花行路難諸篇其寓意深矣其  
取類廣矣非漸濡於  
高皇帝之澤不及此為之諷中州  
齊魯嘆曰美哉雍雍乎莊而偉



辨而精若洙泗講藝白帟論經  
非鴻生鉅儒不能聲出金玉而  
詞吐珠璣也為之諷田居則又  
嘆曰至矣哉憂深而思遠功大  
而衷虛悠々乎有漱流枕石之  
趣若誦逍遙秋水諸篇而神遊

於六合之外也為之諷西征則  
又嘆曰美哉沉而雄忠而不避  
難其有六月采芑之遺乎用能  
執訊獲醜以奏膚功豈虛也哉  
續嘗竊謂古今詞人有才勝情  
勝養勝法勝而氣匪剛大其詩



言集序  
必弱公於詩長短大小輕重疾  
徐無不如意則不窮于才陰晴  
舒慘悲喜聚散咸極真趣則不  
窮于情比物連類援古證今咸  
切事情則不窮于養開闔變化  
氣格音韻咸準古人而中繩墨

則不愆于法具是四者而剛大  
之氣實宣洩之故能上凌風雅  
下逼漢唐大曆而後莫敢望也  
不寧惟是凡公所為破壯虜俘  
夜郎闢土啓疆樹駿流鴻雖謀  
猶壯哉六浩然之氣塞于兩間



詩集序  
能籠蓋宇宙而震懼華夷也。公  
年方及艾，製作將益富，勲業將  
益盛，今暫奉  
太夫人歸葬，他日  
天子召公作相，使補山甫之袞，而  
作吉甫、穆如之頌，纘猶及見之。

當執弱翰以從，盡錄而歸，以備  
一代風雅。公其許我乎？作李少  
保詩叙。

萬曆歲次乙巳仲春既望

溫陵黃克纘頓首謹書





詩序

李于田詩集序

昔孔子述六經詩居一焉世傳為周公作者四篇棠棣語兄弟之情也七月為農夫之言也東山為東征歸士之言也鵲鴝為鳥之言也其言無不曲盡其妙即東山之詩述在塗之零雨想鵲鳴之興



歎細至於桑蠟伊威蠕蠕熠燿  
可以觸緒生情者靡所不及而  
探其夫婦之私以新舊為證言  
語可悅聲音可愛羈客離女所  
嗚咽涕泣而道文人墨士所極其  
心力而言者不復過此余意當文  
武成王時雅頌之詩必多出於周

公者不則孰能洋々郁々若彼者  
乎故詩之道至大矣至妙矣非夫  
洞徹無遺之識其孰能知之非夫  
員神不滯之才其孰能為之而世  
之人徒託於雕蟲之說以掩其陋  
夫善雕蟲者未有過於天地者  
也而不以貶天地之大要之出於自



詩集序  
然歸於大雅乃足觀也。以此求之  
昔之詩人傳稱至今者蓋亦鮮有  
可觀者焉。嗟、難言哉。蓋詩必  
從悟入。悟而後有所用其才。否則以  
巧益其醜。悟而後有所用其學。否  
則以博益其腐。故世之人。於子美獻  
吉之詩。大率隨聲妄贊耳。真知之

者與有幾。余友李于田自童子時授  
之經。若其素習使之文。則能文。稍  
長見人為詩。則又能詩。二十成進士。益  
肆力於詩。嘗謂余曰。李獻吉而後  
詩絕矣。魏懋權之詩也。唐世人莫知  
也。然必傳懋權往矣。吾二人勉之哉。  
于田詩不專學一家。然自不詭於作



者其堂正佩玉垂紳之度可敬也而妍姿秀色可掬也其飲日顛雲龍蓋一世之氣可駭也而溫和平粹可愛也其江奔河激飛湍于寸毫可畏也而微言醇味可繹也其龍鱗鳳羽五色組紉可觀也而雅淡古質可貴也其慷慨激烈如

荆高之筑可悲也而婉孌嬋媛又可念也出之若不经意而寄興自逸古調近體長篇短韻廊廟江湖天地山川草木昆蟲大人兒女之情無所不能言無所不極其妙此所謂洞徹無遺之識員神不滯之才非耶是故其為令則澤浸嵩少之草木其



興文教則河洛齊魯之士斐然向風  
其仗鉞遼左則勒燕然之石其受劍  
征反楊酋則開夜郎之塗其治河則  
馮夷效靈天吳弭首蓋于田識足以  
照幾量足以持重明足以辨物方  
足以植則弘足以得人性兼群道體  
被衆美是以動與福會言與妙合自

古及今立功名者不必能詩能詩者  
每以詩人終猥云非窮不工若于田  
者即未可謂聖人乎豈非翠兩間  
之靈秀應中興之輔櫟者哉識者  
實鮮後進畏其才氣或以為今之  
詩人流俗見其勲伐以為與世之  
所謂邊才等埒余之交于于田久



詩集序  
深知之故序其詩以及其人後有  
君子必以余為篤論也

高邑趙南星譔

李少保詩序

昔者孔子刪詩所存十五國風即  
出於閭巷婦孺之口為萬世經而  
東南無一焉東晉南宋中原文獻  
播遷僑寓江左作者相望固西北  
支涼餘裔也寧當侈然自予雄而  
目中原為儉楚乎



高皇帝由江左取天下都金陵用夏  
變夷則文獻在東南者翔洽西北  
列聖嗣之定鼎于燕則文獻在西北  
者等埒東南唐大曆以降詩道陵  
遲邇諸君子力還古始其在成弘  
為賓之燕人也其在德靖為獻吉  
秦人也其在嘉隆為于鱗齊人也

皆西北產皆李姓事大奇而今有  
少保李公公又魏人也則益奇文  
正時唐中晚宋元諸調雜出能卓  
然自立不為所移如秦民湯武一  
代先驅其才具宏通韻致平暢而  
或議其乏精研之功北地模範杜  
陵如龍躍天門雲蒸雨驟而或議



其蹊徑未脫稍涉粗豪歷下高華  
清絕如峨眉萬仞積雪參天而或  
議其孤峻未甚符于溫柔敦厚之  
教少保公詩三公所應有則有三  
公所應無則無召桓公述溫季言  
過于四之無不及其斯之謂乎公  
弱冠能古文辭為齊魯河洛人師

視北地歷下倍之未四十而開府  
未五十而公孤名位比肩文正東  
北討虜距倭西南宣播斥地數千  
里為肥縣開洳通漕皆宇宙創見  
事絳灌隨陸元劉姚宋昔人所嘆  
其難兼者公已具足而所為詩復  
奄有三李先正之美則益奇矣晉



東渡而天下勢分至隋南合而唐繼之合最久故唐詩為最盛五代分崩宋有天下勢不盡合合未幾而南矣雜以金遼元侏儒而明合之最久故詩最盛與唐頡頏公生畿輔股肱聲教首善涵泳彌深魏大名也古為冀州帝都在焉地靈

人傑天所鍾美固非偶耳世人艷公勲業而不悉其文章是編皆詩又不盡公文章而公雅不欲博名高其傳厯厯嗟乎此公之詩所為奄有三先正也

京山李維楨本寧父撰



嵩下稿

河北李化龍于田著

汴中贈趙夢白三首

瑟々西風至吹我征衣裳  
征人不可見況復望故鄉  
此時逢我友乃在夷門傍  
昔為雙飛龍轉盼天一方  
丈夫有遐心寧為兒女傷  
執手未云已仰視浮雲翔  
鴈飛各有適人生各有將  
且為解征裘同醉酒壚傍



大海湛珊瑚方流起迴瀾長風一萬里波  
浪欲漫天所志在探竒寧畏險與艱我有  
太古瑟促柱為君彈音響六何哀知音諒  
獨難舉世各自媚識曲惟所歡去々勿復  
陳結軫何時還

朝登大梁城還望三川道黃河流潺々行  
人苦不早悲風生大隄四野多秋草景光  
一以逝誰能顏色好莫以百年身天地終

枯槁行至崇令德榮名但自保

、春日登九臯山絕頂遊鶴鳴觀

東風吹草遍山城春盡看山眼更明龍去  
深湫猶帶雨鶴歸華表不聞笙洪河半落  
函關外嵩麓遙連華嶽平總為探竒歸未  
得千岩仙籟起松聲

城樓送張學博之關中諭

城頭楊柳望中新城上開尊送遠人到處



功名應泮水行邊客計有綸巾十千美酒  
堪邀月百二雒關好問津此去知君能變  
俗古今豪傑自三秦

送程南陽入為吏部郎

南陽佳氣鬱菁蔥喜見飛鳧入遠空幾處  
謳歌還杜母千秋啓事復山公人過錦里  
花成纔馬踏天街月滿宮此日倘勞明主  
問莫言魏尚老雲中

寄鄭檢校思成關中八首

長安西望五雲間渭水黃河天上還一自  
歲星零落後至今紫氣滿秦關

何限汀洲老白蘋西風萬里一孤臣縱然  
沽得新豐酒可有燕中擊筑人

家本燕山易水傍無端走馬入長楊關中  
豪傑休相問不是當年秦武陽

高秋落日獨登臺長樂甘泉迺照開賦罷



凌雲應自嘆風塵誰問馬卿才

函關回首望中疎才子飄零嘆謫居莫倚

俠遊燕趙氣只今不是棄繻初

咸陽小吏走風塵醉後清狂態更新官仍

騎馬誰言賤劍可彈魚未是貧

蚤歲才名京洛聞府中從事謬終身此身

已被蛾眉悞官長從教罵廣文

搖落深悲宋玉秋浮生何處不離憂可憐

一掬綈袍淚併作黃河萬里流

送孫薄遷王官歸里

翩翩征馬嘶離群一曲清歌解送君彭澤

先生惟愛酒梁園賓客總能文二周城關

籠秋雨三晉山川倚暮雲便曳長裾無不

可鄴中清讌至今聞

魏懋權見過夜酌

握手春風紫禁隈新豐美酒為君開坐中



白雪元同調何處黃金更起臺闕傍芙蓉  
清漏近夜分河漢曙光催為言珍重雙龍  
劍漢主今思作賦才

燕臺歌醉後贈魏二

燕臺二月春始還東風吹沙白日閑出門  
是處惱塵滿那能不作遊子顏五侯七貴  
何纍纍九陌相逢鞭不起踏踏馬蹄君忽  
過入門一笑情何已春酒春來清復清十

千何惜與君傾狂吟爾自高常侍痛飲吾  
堪阮步兵憶昔相逢漳水北可憐偏側復  
偏側問字相看解果冠橫經俱帶藜藿色  
爾時兄弟並稱難我亦才名季孟間青春  
搖漾風雲合白日揮毫雨雪潛春去秋來  
那可見荏苒流光倏奔電我行作吏向風  
塵君今射策黃金殿黃金臺下多悲風易  
水蕭蕭還向東燕昭無復金求駿荆軻虛



傳氣貫虹吁嗟英雄本無主彭祖巫咸已  
終古耳熱聊為擊缶歌時清何用聽鷄舞  
夜入天河北斗橫腰間雙劍向人鳴城頭  
吹角城烏起壺中已盡君可行

登思遠山是武后避暑處

飛峰上與白雲開萬里秋風到客顏西望  
關門仍紫氣中封洛口自青山金輿玉輦  
無消息野烏林僧信往還芳草未零叢桂

發好携仙侶弄潺湲

送鄭思成之雲中觀省

聞君走馬向邊城二月春寒草未生關樹  
依微籠野磧朔雲歷亂傍危旌萊衣好舞  
從軍樂馮鋌堪彈出塞行少壯封侯君自  
得漢庭何用請長纓

宿山寺二首

野寺秋山裡蕭條古木疎松風飛梵響花



雨落禪居溪阻僧歸月天空鴈度書夜深  
鐘磬發靜者意何如

不語僧歸定支頤客罷吟白雲憐幻影流  
水見禪心風靜山花落窓虛月露沉明朝  
岐路隔引首媿東林

渡汝水有懷趙夢白

故人別後又秋風經歲飄飄似轉蓬便把  
相思投汝水隨波一夜到天中

登洛城樓

寒城四望阻煙波天畔登樓一放歌日薄  
函關秦道路天低廣武漢山河深秋萬戶  
鳴砧發向夕千崖落木多信美真成王燦  
恨故園風物近如何

永寧道中懷故令秦丈

秋山遠近帶煙霞晴色褰帷覽物華蘿徑  
逢人唯著笠石田隨處點桑麻川原脩竹



閣下水客路垂楊隱暮鴉一自仙郎鳴玉  
後平林開遍野棠花

弔子房墓

漢帝屈群策君侯獨定傾酬恩五世重避  
難一身輕黃石元籌國赤松不為名尚留  
荒塚在終古傍韓城

夜坐

客愁不可極永夜坐空城高閣流螢度虛

屏落月橫淒涼鄉土思歷落宦遊情慚愧  
陶元亮歸來松菊榮

過鞏縣李明府招飲即席有贈

吾宗豪傑本三秦結綬中原意氣真盡道  
鳴琴同宓賤寧知投轄似陳遵秋山半帶  
嵩門雨遠水全消洛浦塵明發坐携餘興  
往天涯何處不懷人

壽沈上林公從伯英請也二首



酒滿瑤池海滿籌丈人騎鶴碧山頭怪來  
名占長生籍原是蓬瀛第一流  
珠履闌門共舉觴蘭孫組綬拜中堂天開  
斗極千年照地轉江流萬里長

送黃太史冊封唐藩

芙蓉清露散金莖紫鳳丹書出禁城天遣  
桐珪分帝子人因玉節識星精原疇遠近  
河山繞花樹參差觀闕平自昔南都康麗

地應知授簡賦三京

寄趙夢白

夷門夜月憶相攀別後音書漫往還經歲  
煙雲桐柏水懷人雨雪鳳凰山窮途阮籍  
狂難下病肺相如賦獨閑世事抽簪無不  
可風塵容易到朱顏

九日同王內翰諸君子登高

千林風雨入重陽上客登臺興未央檻外



黃花秋澹，天邊白鴈起行，官情轉憶  
江湖闊。世態誰憐，杯酒狂，揷遍茱萸人總  
健。醉看落木下寒塘。

送李將軍行邊

白草黃雲大漠天，將軍逐旆勒燕然。登壇  
雪霽千山外，倚劒風生萬馬前。材容如林  
探虎穴，胡兒向夜走狼煙。却慚絳灌空言  
武，枉把長纓屬少年。

寄魏懋權

篋中尚覩八行書，天外空憐三載餘。畏路  
風波誰好在，故鄉花月尔何如。山連嵩嶽  
饒鴻鴈，門對漳河足鯉魚。別後新詩須寄  
我，向風搔首一躊躇。

登阮籍嘯臺

積水平林四望開，誰能長嘯更登臺。清狂  
不散窮途恨，禮法寧容玩世才。廣武天空



雲黯澹鄴城人去鳥飛迴悲來欲下英雄  
淚蕭颯秋風萬壑哀

中秋同于趙諸君玩月

鴻鴈蕭蕭涼思生白雲飄渺散孤城千門  
半落銀河影一葉輕流玉露聲北海樽開  
客正滿南樓月皎興逾清六知後會無多  
健潦倒謹呼此夜情

送王太史之京

關城曙色上鳴珂木落千山征騎過洛下  
才名賈誼少漢庭賓客鄭莊多金莖舊識  
青雲氣玉署新傳白雪歌聖主臨軒應有  
問為言渤海靜風波

贈汪生讀書城西山寺二首

遠寺高僧隱深山倦客栖冥心超象海玄  
想悟金鑑野色千巖滿秋聲萬樹齊晝長  
無一事清梵過前谿



不識西山路因君憶化城  
殺函孤嶂出嵩少暮雲平  
鹿坐閑分草鶴行靜聽經  
向平多隱意簪綬吾生

過豫讓橋

石徑冷蕭蕭相傳豫讓橋  
九原孤劍在三晉一身遙  
故國山河改空林草木凋  
寒流鳴更切遺恨未全消

登叢臺

舊識邯鄲道今登趙氏臺  
山連三晉險川逐九河開  
地迥天垂野城荒樹雜苔  
綺羅隨逝水宮殿化塵灰  
霸氣千年盡雄風萬里來  
蒼蒼望不極延眺轉興哀

渡河

頻年為傲吏幾度泛長河  
二月風濤險三川驛路多  
海雲生極浦山雨集迴波  
一別滄洲路臨流媿棹歌



昭君怨二首

月白天空夜有霜寒風如雨灑長廊窓前  
鸚鵡呼難起浪說吹簫引鳳凰  
亂草愁雲沙作風那堪一騎獨和我夜來  
猶笑深宮女錯把黃金買盡工

洛陽李明府招飲劉氏園亭二首

勝地何年闢高軒此日過屏山分二室瀑  
水借三河塵想浮雲失幽思芳草多九逵

車馬動興逐且高歌

新荷窺細沼嬌鳥語前林並是神仙令居  
忘朝市心登臺青嶂合倚劒白雲深薄宦  
頻遊此誰能嘆陸沉

秋日齋居四首

五見寒城菊今來又及秋林疎蟬嘒水  
淨鷺悠々湛露隨涓滴浮雲任去留陸沉  
無可嘆吾道在滄洲



自是枋榆翼誰圖大海南婆娑機事少緯  
繡世途諳榮啓三宜樂稽康七不堪途窮  
車自返肯共俗人談  
地僻恣登眺孤城抱萬山河流依漢壘華  
掌傍秦關牧笛桃林淨漁舟洛浦閒終須  
招隱士乘月弄潺湲  
何處送秋聲蕭蕭古樹鳴林間不受日荷  
弱竟隨萍旅客愁偏劇孤臣涕欲橫著書

吾耒老解印逐虞卿

哭戴丞三首

天遠真難問斯人竟杳然一官空白首萬  
事已黃泉故國鄖襄外遊魂嵩洛邊生平  
不下淚今日涕如漣

止謂青袍誤何緣禍轉殷屈平方問卜管  
輅已修文素漣悲流水蒼梧怨暮雲中原  
知己在解劍贈徐君



官情真似水天路竟如鉤實有塵生甑虛  
傳狐首止龍蛇傷厄歲山澤失藏舟寥落  
庭松在悲風夜未休

送陶別駕致政歸里二首

蒹葭白露遠蒼々楚客懷歸水一方去國  
尚餘直道在掛冠寧復畏途長五湖月送  
鷗夷棹三迳雲封蔣詡堂前路逢人莫問  
姓家聲原有晉柴桑

留滯周南幾見春乞閑原不為思尊路隨  
獨鶴寧辭遠壁有懸魚始信貧京洛風塵  
違薄宦瀟湘荷芰近騷人相看不作臨岐  
色久識先生隱是真

送王子英轉餉之京

雲物陰陰鴈陣疎上供使者意何如虛傳  
龍劍能依斗實有驂騑困負車匹馬孤舟  
秋色遠黃花白酒客愁初相逢倘問元龍



事湖海當年氣未除

京邸魏懋權過飲言別

市橋官樹鳥嚶嚶，倦客開尊對友生。  
千里江湖今握手，十年河朔舊知名。  
愁來北極浮雲滿，醉裡西山片月明。  
此別風塵俱落，落相看何限故人情。

同賈少卿孔司城登九臯山遊鶴鳴觀  
一自仙人跨玉鸞，獨留丹竈俯瑤壇。  
深潭

曲抱虬龍窟，飛閣遙臨鴈鵝灘。  
地接三川奔廣武，天圍太室拱長安。  
頻來欲問無生訣，拓落風塵媿二難。

聞魏懋權登第率爾有成

錦字誰傳天上書，故人佳問未應虛。  
幾年獨下荆人淚，此日爭看渭水車。  
瓊樹瑤林增氣象，石渠金馬聽吹噓。  
天涯翹首山城吏，慚媿河汾授業初。



聞洛中史李二君登第志喜

二月楊花飛禁城，無人不道玉為京。  
燕臺得駿俱千里，洛下空群羨兩生。  
御苑聯驄嘶曉騎，上林把袂聽春鶯。  
遙知分得金莖露，應念文園病未平。

秋興八首

徙倚高城思不禁，天風蕭瑟入楓林。  
山空薜荔寒無色，水落蒹葭迥自深。  
上國煙花

秋澹、故人書問日沉、誰憐歲晚西遊、  
客搔首青霄聽暮砧

洛陽自古中原地，獨抱孤城控萬山。  
東望白雲封漢檢，西來紫氣擁秦關。  
君王劍舄留金盃，帝子樓臺想玉顏。  
風物不殊人代改，黃河如帶只潺湲。

獨上青山坐不歸，誰家玉笛弄清暉。  
寒鴻過塞天同遠，倦鳥還林日漸微。  
張翰蓴鱸



思轉劇陶潛松菊志多違青袍白馬渾閑  
事汗簡英雄有是非

曾為計吏入朝班曉露初晞引珮環風靜  
九閭屯席豹雲開萬國集鵷鸞孤臣戀闕  
江湖遠聖主垂裳日月閑一別春明門外  
柳每從北斗望天關

傳聞鹵騎薄遼東復道軍符出漢宮萬里  
旌旗迷老上千山鼙鼓急回中胡兒淚落

關山月漢將旌搖朔漠風迂謬豎儒慚汗  
馬虛將長劒倚空同

陸渾山色接嵩丘萬頃雲煙凝素秋勾漏  
丹砂淹葛令漆園蝴蝶夢莊周金堂石室  
神僊隱豐草長林麋鹿遊最是生平耽野  
興悔將傲骨覓封侯

三花二室切雲霄縱覽神州入望遙向夜  
高僧行問偈有時仙侶坐吹簫峰前獨鶴



窺丹井。洞口長松護石苗。回首浮丘接引處。更無消息到今朝。

蓬萊宮闕倚雲開。早歲長楊獻賦來。洛水同舟唯郭李。梁園授簡合鄒枚。談天半集燕王館。結客全傾郭隗臺。一卧荒城今六載。寒山吟望獨徘徊。

### 嵩陽宮

懸崖壞壁草荒。傳是嵩陽舊日宮。何處

閒雲飛嶺外。有時佳氣起封中。螭紋剝落唐碑古。虬樹陰森漢柏雄。指點千年成感慨。悲風蕭颯萬山空。

### 登中嶽

獨步崧峰最上頭。憑凌萬里見高秋。西連紫塞千山出。東指黃河一線流。漢時秦封何處所。盧巖許嶺自清幽。登臨頓失風塵色。極目浮雲澹不收。



三將軍柏

千年藥傍萬年枝，闕道將軍自漢時。  
勁節元同天地老，貞心真與日星垂。  
空山日落群龍舞，孤嶂風寒野鶴遲。  
却怪當朝祿食者，婆娑曾上劇秦詞。

登天中閣

橫天飛閣俯神州，漠漠中原此上游。  
地轉三河紛秀色，窓開八極起涼颼。  
峰頭夜聽

玄猿哭檻外，朝看白鹿遊。  
回首漳川何處，是仲宣無賴賦登樓。

五品封槐

秃枝老幹已龍鐘，道是曾膺五品封。  
誰向山中招大隱，由來捷徑在崧峰。

達摩面壁石

達摩此面壁，形踪如可辨。  
飛空本無迹，遺像終成幻。



登崧憶趙司理夢白

仙郎何處歌陽春。一水盈盈不可親。三十  
六峰吟望遍。平川漠漠總愁人。

過候氏有懷朱寄和

美人為政有輝光。駐馬山阿問故疆。除目  
久看新令尹。田夫猶話舊循良。瀟湘水落  
雙鳬杳。嵩洛天寒獨鴈翔。最是鶴原成帳  
望。論心何處更聯牀。

大梁宗留守祠

中原何處覓堯封。一騎胡塵盡族從。玉輦  
北巡天萬里。翠華南幸水千重。孤臣自灑  
都門淚。奸相終驚海上烽。立馬荒祠心折  
盡。故宮遺恨草茸茸。



